


357 45 / B

450

OBSERVATA
QVAEDAM
M E D I C A
CUM FIGURIS AENEIS

A
M. I. MARX

MED. DOCT.



BEROLINI,
apud CHRIST. FRID. HIMBURG.

1772.

ATLAS

1897

A D I O E M

1897

1897

1897



303636

1897

1897



SERENISSIMO
CELSISSIMO PRINCIPI

AC

DOMINO DOMINO
LEOPOLDO FRIDERICO
FRANCISCO

PRINCIPI ANHALTINO
REGENTI
DVCI SAXONIAE, ANGRIAE ET
WESTPHALIAE, COMITI ASCANIAE,
ET BERENBVIRGI

RELIQVA

P R I N C I P I
IVSTO, PRVDENTI BENIGNO
MVSVRYM PATRONO

DOMINO MEO LONGE
CLEMENTISSIMO

Digitized by the Internet Archive
in 2019 with funding from
Wellcome Library

SERENISSIME
AC
CELSISSIME PRINCEPS
DOMINE CLEMENTISSIME,

O*ctavus jam agitur annus, SE-*
RENISSIME PRINCEPS,
ex quo insigni TVA clementia *hic*
loci medicam exercendi artem liber-
rinam dedisti potestatem.

Ex illo tempore de nulla re magis
solicitus, quam ut quocunque modo
gratissimam meam mentem testatio-
rem redderem. Cum id melius fieri
non posse crederem, quam si aegro-
tantes sine discrimine proximos, qua-
licunque consilio, ope et auxilio pro
viribus meis diu noctuque subleuarem
utilemque illis praestarem operam,
eosque itaque non solum quoties ju-

*bebant diligenter visitando, sed et
domi eorum morbos horumque causas
attentius considerando, subinde no-
tatu digniora congerendo, ut ea et-
iam possem aliquando cum orbe litte-
rato fideliter communicare.*

*Natum ex praecipuis notatis
praesentem libellum suasu amplissimo-
rum nonnullorum in arte professorum
orbi litterato exhibitum, cum com-*

missi quasi muneris rationem reddat, ut

TIBI, SERENISSIME PRIN-

CEPS, *denississime offeram, humilli-*

mo meo convenire arbitrabar officio,

ut simul publicum deuotissimae meae

erga Celsitudinem TVAM obser-

vantiae momentum erigerem.

Suscipias igitur, precor submis-

PRINCEPS CLEMENTIS-

SIME, *foetum hunc qualemunque*

*meum ea, qua erga bonos constanter
geris, hoc est, serena fronte, et in
posterum etiam me celebratissimae tuae
benignitatis ac gratiae alis clemen-
ter protegas.*

*Deus summus medicus Celsitudi-
nem TVAM ad seros usque aetatis
annos sospitem ac incolumem con-
seruet, insuperque regiminis perpe-
tuum felicitis gloria summa, ac omni-*

*genae tandem prosperitatis gaudio
beet cumulatissime.*

Ita ex intimo vouet animo

SERENISSIME
CELSISSIMEQVE PRINCEPS
DOMINE CLEMENTISSIME
CELSITVDINIS TVAE

Seruus humillimus


M. I. Marx.



LECTORI BENEVOLO SALVTEM!

Negat Galenus in Comment. ad Aphorismum primum Hippocratis artem medicam suo tempore ad summam perfectionem perducere propterea posse, quia hoc nonnisi diligenti assiduaque rerum observantia contingere queat, et primos inventores omnia statim et incipere, et ad finem perducere posse, quae maiores tradiderint et fundarint, ea magis stabilire novisque inventis perficere.


Nihil itaque iucundius, nil antiquius est medico prudenti, quam non modo nova remedia invenire, verum etiam remedium morbi certum et celeriter efficax licet iam inventum non tamen experimentis satis probatum cognoscere



scere et experiri, cumque orbe dein litterato, prout ipse cognouerit, utque experientia doctus fuerit, communicare.

Cumque prae aliis reipublicae medicae utiles existant illi, qui ea, quae circa morbos et aegros notatu digna occurrunt, conscribant; medicam quam vocant praxin aggressus, ideo ea, quae notatu digniora videbantur, notavi, quaeque antea nonnullis amplissimorum in arte salutari virorum rescripsi, illi ipsi, quos summa prosequor reuerentia, ut ea cum orbe litterato communicarem, sollicitauerunt. Eorum itaque deesse votis praeceptisque ego quidem nolui.


Offero igitur Tibi Benevole Lector, ex iis, quae in praxi mea colligere mihi contigit, obseruatis pauca quaedam, cum plura iam addere, tempus deest; frueretur hisce mecum et dextre iudicando ad plura me excitabis. Vale, conatibusque nostris qualibuscunque interim faue!






Lumbricus

latus feliciter expulsus.

 Lumbricum latum corpore humano prorsus expellere, difficillimum habetur, quod adhuc nuper perillustri Nil Rosen de Rosenstein statuit, causam ponens in illius longitudine, et in flexibus multis intestinorum, et in facultate, qua vius gaudet, cacumine extremitatis angustae et canalibus fugentibus, qua singuli eius articuli instructi reperiuntur, ad intestina se applicandi. „Haec, ait Vir celeberrimus, est causa, cur „aegrotus, si expulsio Lumbrici istius ten- „tetur, tantos dolores patiatur, si vero „nossemus remedium, quod eundem ita „necaret, ut nec ventriculus, nec intestina „duri-




„duriter tractarentur, tota res foret facillima, nam necatus neque cacumine isto, neque canalibus fugentibus se applicare potest, sed solutus jacet, ac cum excrementis abire cogitur: At tale remedium nondum scimus. Vehementer autem miror, perillustrem ac Doctrina singulari insignem Archiatrum unum remedium Lumbrici lati, quod tanquam specificum diu notum est, ne memorare quidem. Num de illo nihil legit in eruditis actis Edimburgensibus ac Parisiensibus? hoc ego vero non crederem. An forsitan isti remedio fidem non habet, an potius super eo nil experimenti instituit?

Vt igitur egregium hoc remedium dignitate sua fruatur, ejusdemque viuae efficaciae perquam utilis ac praesens observatione confirmetur, meum esse puto, quid super hac observauerim, & quo remedio adversus illum Lumbricum usus fuerim, hic declarare; (res ipsa quidem in Novis Magdeburgicis sed sine significatione remedii ab aegroto manifestata est) praesertim cum hic lumbricus communibus et vulgo
adver-




adversus vermes vsitatis remediis adeo non possit ejici, ut potius multos morbos molestiasque excitet; Accedit, quod multorum interesse arbitror, efficacia et usu comprobata remedia nosse, quorum ope possint illo liberari.

Cum ego Anno 1765 extremo a nonnullis aegrotis Seruestam vocatus essem, venit ad me vir plus quadraginta annos natus, qui conquerebatur, se tensionem abdominis cum torminibus & dolore vago conjunctum ascensum & descensum quendam circa umbilicum, & in latere pondus quendam sentire, quae symptomata jejuno tempore acriora erant; his accedere nauseam, et magnum salivae affluuium in ore, noctu somnum esse, atque recenti quandoque tanta edendi cupiditate flagrare, ut non posset satiari, quandoque ea prorsus carere, corpus et vires singulis diebus decrescere, et colorem faciei mutari singulis momentis temporis. Ego dicta ista symptomata enarranti, respondi, ipsum vermibus laborare, qui istorum symptomatum causa essent. Tum aeger narrando pergit, aliquando
sumto



sumto laxatiuo cum excrementis exiisse vermem, quem, cum ille mihi eius formam indicasset, pro Lumbrico lato habui. Nec me mea fefellerat opinio. Multis remediis sine fructu ac utilitate adhibitis, tandem alii, quos ille aeger consuluerat, suaserunt, ut Gummi-guttae fumeret, sed noluit hoc uti, nec ego quidem, ut fumeret, poteram illi autor esse; nam etsi remedium istud inter maxima draastica esse numerandum, sciebam, dubitabam tamen, an praeter caeteris drastrictis multum contra lumbricum valeret. Potius suasi ei, ut lene, certum mihiq̃ue experientia notum specificum adversus hunc aliosque vermes adhiberet remedium. Praescripsi itaque, ut mane et vespere drachmas duas Limaturae stanni rasae cum melle in formam bolorum redactae et singulis hebdomadibus pulverem ex aethiope minerali cum rheo fumeret. Quid accidit? Sumpsit ille per errorem primo die dimidiam unciam loco dosi praescriptae ac postridie partem Lumbrici circiter quinque vel sex cubitos longam mihi attulit. Ac cum per duas tresve hebdomades remediis iussis



iussis vteretur, secundum praescriptam methodum singulis diebus partes Lumbrici abierunt, ita, vt aegroto vsus remediorum nihil molestiae omnino afferret, impetus morbi potius quotidie minueretur, et tandem cum ultima pars, quam mihi attulit, exiisset, plane desinerent. Nec licet plures adhuc doses sumeret, quidquam decessit amplius. Ille vero etiam deinceps nutriri coepit, et elapsis aliquot mensibus vires et sanitatem plenam recepit, qua ad hunc usque diem ita fruitur, vt nihil sentiat incommodi, immo egregie corpus ejus accreuit; neque mirum, cum succi nutrientis, quo nunc solus fruitur ipse, magnam partem voracissimo suo hospiti assidue suppeditare debuerit.

Lumbrici descriptionem additis etiam iconibus tradiderunt iam plures auctores, imprimis at D. Andry; neque igitur in eo describendo, vt longus sim, opus est. Capite solo a descriptione D. Andry aliorumque differt lumbricus a nostro aegro expulsus, vtpote quod duobus cacuminibus terminabatur, vt icon subjuncta docet, quam ideo



addidi, quoniam alibi non inuenio ejusmodi terminationem vermis. Caput hoc mirabile, eoque magis notandum est, quoniam, quamdiu extremitas haec restat, tamdiu vermis quotidie increfcere potest, nec antea, quam haec abiit, possumus certi esse, totum lumbricum exiisse.

Caeterum erat ex descriptione D. Andry aliorumque totus albus, laevis, constabatque articulis; singulis in articulis reperiiebantur vnum, duo vel plures tuberae seu papillae, latitudo primarum partium expulsarum aequabat digitum minimum, latitudo et distantia vnus articuli ab altero paulatim decrescebant, quo propior erat extremitati, ita vt vera articulorum proportio obseruaretur; vltima pars in duo cacumina desinens erat angustior et tenuior et articuli sibi propiores. Omnes lumbrici partes centum cubitos explere aegrotus confirmavit in Nouis Magdeburgicis, vbi simul fatetur, vermem sine vllius doloris sensu intra trium hebdomadam spatium expulsum esse, se lumbrico ejecto, vires pristinas et coloris vigorem
recu-



recuperasse, ac duobus mensibus elapsis ad optimam redactum fuisse sanitatem.

Nonne igitur est, quod admodum gaudeamus, cum contra hunc monstrosam vermem, qui tanta difficultate ejicitur, in stanno remedium habeamus, quod eum ita aufert, ut et ventriculo et intestinis non aegre faciat.


At unde huic remedio haec efficacia existit? nonnullas causas a quibusdam perperam traditas in dissertatione mea inaugurali de Spasmodis eisque medendi ratione jam refutaui, quae refutatio per casum nunc memoratum stabilitur; quo imprimis pertinet hoc, quod Stannum non ob materiam arsenicalem secum conjunctam vermibus aegre facere ac aduersum esse possit: nam et hic aegrotus (de quo loquor) et multi alii, quibus Stannum etiam contra alios vermes felici successu dedi, (quorum casus describere non attinet) possunt ostendere, Stannum etiam magna copia sumtum, et tempore usus et postea nunquam, etsi usum diu, continuerint, effectum prauum pro-



duxisse. Quid? quod etiam in infantibus praeclaram ejusdem virtutem contra vermes sum expertus, quod et exemplum puellae decennae in Dissertatione mea descriptum docet, et nuperrime in Patria mea de foemina plus sexaginta annorum eodem remedio expulsi Lumbricum immensae magnitudinis (quem equidem aliquando possedi, sed postea iussu Electoris Eminentissimi Colonienfis sanctiori, quod aiunt, repositorio arcanorum naturae asseruandum curavi:) tempore octo dierum sine ullo incommodo, nuncque postquam tot ac tantas molestias a verme perpeffa est, prospera fruitur sanitate. Hac in foemina observaui vermiculos figura cucurbitina magna copia excretos, qui cum sint rescissae partes Lumbrici, illi, dum apparent, pro horum pathognomonico signo habendi sunt.

Quali autem ratione vim suam exerceat, incertum adhuc est: id quod ego malui ingenue fateri, quam hypotheses proferre; sufficit experientiam docere, Stannum esse praeclarum et certum Specificum contra vermes. Aliis relinquo disputandum,

an,



an, dum intestina laeuigat, vermes ab iis separet, et taeniae imprimis facultatem, quam viuus habet intestinis adhaerendi, eripiat. Mihi quidem difficile est credere, illud tam parua dosi assumptum hoc efficere posse; potius non possum non mihi persuadere, illud ipsum sua natura vermibus esse aduersum ac valde molestum. At vtrumque postulare argumenta videtur. En illa! Clarissimus D. Wichmann, celebris apud Hannoveranos medicus, qui egregiam hanc Stanni virtutem aduersus Lumbricos in Anglia, vbi maxime in vsu est, mecum expertus est, ad me ante aliquot annos litteras dedit humanissimas, se Hannoverae taeniam a virgine, variis ante remediis sine fructu vsa, Stanno expulisse, ita vt post primam dosin pars septem cubitorum exierit, et sic deinceps reliquis diebus. Addit vero Cl. Wichmannus, se cum stanno Jalapae radicem commiscuisse; est itaque eo magis notandum, me in casu modo dicto solius Stanni ope taeniam expulisse.

Vnum adhuc notabo, verum Stannum Anglicum dari debere; Stannum enim no-




strum commune posset vel plumbum vel aliud quid noxii continere, quo corpori noceri queat, quae culpa in Stannum conferri non potest.

Caeterum ego Stannum limatum adhibui; aegre quidem in puluerem redigi potest, attamen si quis massam ejus patienter radit, tam subtiliter radi potest, ut in puluisculum tenuissimum verti queat: alioquin potest granulari vel calcinari atque sic facile in puluerem redigi.




Tussis

*T u s s i s*

inueterata radice rubiae tin-
ctorum curata.


Homo quidam annorum LXVII et temperamenti phlegmatico-sanguinei mense Junii 1765 cum me arcessisset, narrat, se tussi acerrima coniuncta cum magna raucedine et cum tenacis et viscidis muci rejectione interdum pariter et noctu vehementer vexari; simul laborabat oppressione pectoris, et molestia in ascensu scalarum: sentiebat quoque ascensum muci tenacis in laeva pectoris parte, quem assidua tussi dolorem ferente et excreatione sursum trahere studebat. Deinde quiete fruebatur per breue temporis spatium, malum vero statim redibat et sic durabat, vti semper ita maxime noctu. Quando aliquot horas somnum ceperat, et per tussim e somno suscitatus erat, deerat ei, vt ejus verbis utar, aer, i. e. respiratio quasi interrompebatur et suspendebatur, et cogeatur tamdiu tussire, donec aliquid solueretur ac expectoraretur muci:



nec poterat sine molestia sinistro lateri incumbere.

Haec tussis iam, cum esset triginta et vnus anni, incepit, idque vti ex eius narratione intelligere potui, ex refrigeratione quadam (tussis enim, qua anno aetatis sexto et vicesimo laborauerat, post sanguinis missionem sensim sedabatur); hoc affectus est malo non sine summa molestia, praesertim tempore hyberno, quo tussis maxime exacerbabatur. Variis in locis vel per quae iter faciebat, vel in quibus morabatur, remedium petiuit a multis.


Alius causam posuit in capite, catarrhum capitis, vt ajunt, esse credens, quia aegrotus Cephalalgia laborabat simul, quae tamen a vehementi oriri poterat tussi: alius causam in ventriculo quaerens, nominabat tussim stomachalem: Alii alias proferebant causas. Vtitur ergo infusis herbarum pectoralium et ejusmodi juribus, innumeris syrupis pectoralibus, quibus fiebat, vt mucus eo firmitus pectori adhaereret, ejusque affluxus augeretur, tussisque sic in consuetudinem abiret. Quia tamen legitimū
diae-




diaetae ordinem obseruabat, non adeo male sese habere videbatur, praeterquam quando tussis singulis quatuor vel sex hebdomadum spatiis haerebat, ita vt nihil muci soluere-
tur ac expectorari posset; tunc enim maxi-
me augebatur, donec diu tussiendo & ex-
screando aliquid muci rejiceret. Tussis
singulis augebatur annis, ita vt anno 1746
magnam excitaret herniam, qua adhuc la-
borabat, cum ipsi accersitus eram. Aegro-
tus vt sibi consuleret, infusis herbarum vte-
batur seque domi tenebat, ambulatio enim
et imprimis frigus pectoris oppressionem
creabant. Mense Aprili 1765 inuasit eum
ex terrore febris intermittens eaque vehe-
mentissima, quae octo ad decem durabat
dies, deinceps remittebat. Post duas vero
hebdomades redibat conjuncta cum tussi
longe acerrima. Febri remittente tussis
quidem leniebatur, accedebat autem tanta
raucedo, vt vix vlla illius vox audiri pos-
set. Ego mense Junii ejusdem anni cum
eum inuiserem, omnibus circumstantiis
ponderatis ratus sum, ejus pulmonibus a
prima aetate tenacis copiam muci adhae-



fisse. Huc primo temperamentum ipsius phlegmaticum disposuisse, dein refrigerationem causam occasionalem factam; porro usu remediorum dulcium pectoralium affluxum versus pectus auctum et pulmones inde magis debilitatos fuisse. Non igitur plenariam aegroto promittere sanitatem, partim propter ejus senectutem, partim quia morbus tam altas egerit radices, neque omni tamen eum priuandum auxilio putabam, nec speciosa seu palliativa vti curatione volebam, nec ea remedia adhibere, quae tantummodo expectorationem promouerent, symptomataque alleuarent, qua tamen re mucus consuesceret magis pulmonibus adhaerere, cum eidem nobilioribus, quam habitationi muci sint creati. Sed indicationes meas formabam, quae sequentes esse credidi. In principio eam muci partem, quae vere pulmones obsideret, per tussim et expectorationem, deinde vero etiam mucum, qui sanguini inhaereret, resolutum per vrinam (melius enim esse eundem per vrinam, quam per sedes ejicere, mihi videba-



debatur, quia per has aegrotus nimis debilitari potuisset) e corpore expellendum esse; tum pulmones laxos ac debilitatos sensim confortandos, mucique affluxum impediendum. Venit mihi igitur in mentem radix rubiae tinctorum. Haec radix, cujus virtutem me jam experientia docuerat, omnibus à me factis indicationibus, mihi facere satis videbatur. Nota mihi est illa tanquam resoluens, abstergens, diureticum ac simul confortans, praesertim noram illam simul tanquam expectorans agere; nam, ut non ignoro, in peripneumonia notha egregie prodest, et ego nobili cuidam Ictero a viscositate orto laboranti (qui duos ad tres menses multis a variis medicis frustra praescriptis ac adhibitis remediis usus fuerat) illius decoctum per quatuor hebdomades bibendum dedi, quo facto, is non modo Ictero sed & saeuissimis colicae et ventriculi doloribus, quibus diu ante icterum correptus fuerat, breui tempore plane liberatus est. Nolo equidem huic radici soli omnem tribuere effectum; nam antea aegrotum suasi rhabarbari infusum aquoso-vinosum



sum sumere, at hoc sumto symptomata etsi leniora fiebant, non tamen plane cessabant antea, quam decoctum rubiae tinctorum magna copia bibisset, ita vt Nobilis ille, decocti praeclaram sentiens virtutem, me rogaret, vt decoctum hoc per aliquot hebdomades ipsi bibere liceret, bibit, sub eo tempore sanior, quam antea fuerat, euasit, nec vnquam sensit amplius colicae et ventriculi dolores, adeo vt ad hunc vsque diem pro felici ista curatione mihi suum amorem gratissimumque animum significet.

Radice hac in aliis quoque ejusmodi casibus optimo successu vsus sum.

Aegrotum itaque iussi, decoctum (uncia una scilicet radicis in mensuris tribus quatuorue cocta erat) quotidie bibere et quidem tantum, quantum tria vel quatuor vitra cereuisiaria caperent. De floribus vero macis, quos et in aliis casibus addere soleo, aliquid addidi, propter eorum virtutem et resoluendi et ventriculum confortandi, vt nimirum ventriculus potionem decocti ferre posset. Dedi quoque in initio Succum 100 millepedum viuorum cum aqua
cina-



cinamomi et vino expressorum parua dosi, at quia eos viuos amplius habere non poteram, decoctum solum bibere iussi.

Aegrotus hoc decocto per duas tresue hebdomades usus, iam leuamen tussis sentit, in dies etiam melius se habebat, raucedo cedere coepit, et intra sex hebdomades vocem recepit, nec a tussi impeditur, quo minus tranquille dormiat, et euigilatus vel plane non vel perraro tussit, immo autumnii et hyemis temporibus, quae tantopere timuerat, tussi plane non afficiebatur, vt si post somnum quatuor vel quinque horas durantem, experrectus tussiebat, tussis esset facilis, et resolveretur sine vlllo dolore ac sine solita antea faucium titillatione, posset et sinistro lateri rursus incumbere, postquam per sex menses decoctum biberat, sensit praesertim (magis quam antea, nam vrina semper durante decocti vlu, copiose fluxit:) vrinam maxima copia excerni, tandem exeunte vrina sensit dolorem quendam in pene ac si vrina impediretur, sensitque in ejus acumine, tanquam acubus pungeretur, ita, vt dum vrinam mittebat,

mem-



membrum hoc propter doloris vehementiam retraheret, vrinamque fere stillatim mittere cogeretur.

Ego propterea consultus, asseueraui, non esse quod timeat, mucum resolui et per vrinam exire, hincque oriri hanc stranguariam. Praescripsi ei Emulsionem, mucilaginosam, demulcentiam, perrexit simul decoctum illud bibere, quo facto vrina facilius et copiosius exhibat, sed erat turbida, feri lactis ad instar, saepius cum eadem exierunt massae mucii albumini oui similes.


Primis hebdomadibus aliquem dolorem exeunte muco percepit, qui deinde sine dolore exercebatur. Tussis videbatur prorsus evanescere, interdiu omnino non, noctu vero experrectus (etiam tunc raro, praeterquam si sub diei initium e lecto surgebat) parum tussiebat ac sine doloris sensu, atque haec tussicula cessabat simul ac ipse decocti potionem calide biberet; nam tussis tantummodo a siccitate oriri videbatur, ab eo tempore vrina crebrius et copiosius sine doloris sensu tamen exercebatur. Per autumnum et hyemem sibi antea tam
gra-



grauem et moleſtam, tam bene tantaque ſanitate vixit, vt ſaepeius mihi dixerit, ſe intra perplures annos non tanta corporis ſanitate et vigore uſum fuiſſe.

Continuato decocti uſu rediit etiam appetitus qui per multos annos proſtratus fuerat; hoc poſſet quidem floribus maceris tribui, at non niſi in principio eos decocto immiſcuit. Poſtea decocto aſſuetus illos omiſit, vt ſumptibus parceret et decoctum viliori pretio haberet. Hinc apparet, appetitum abſentiae muci, ventriculum antea onerantis et huius nervorum ſenſum hebetantis, adſcribendum eſſe.

Quanquam cum jam 70 annos expleuerit, corpus tamen ejus quotidie creuit vigore, ita vt homines, qui eum norunt, mirarentur, quod tam praeclara ſit facie. Ac vel raro vel prorſus non de morbo aliquo querebatur, niſi quod propter herniam permagnam, ubi refrigeratus eſt, vel in diaeta peccauit, aliquoties de colica conqueſtus eſt, qua tamen mox liberari ſolet. Praeſeruationis gratia nonnunquam eum iuſſi uti rhei puluere, quo quidem ob aluum quo.




quotidie solutam non opus ei erat, ut adeo decoctum illud, ut forsan a nonnullis credi posset, alui obstructionem minime efficiat.

Caeterum doloribus rheumaticis vagis, quibus olim saepius corripiebatur, adeo longo ex tempore liber mansit. Ante annum febris acuta correptus, diem suum obiit.



Morbus



M o r b u s
epilepticus foliis aurantio-
rum curatus.

Foemina quadraginta duorum annorum ante duodecim annos sexto post abortum, quem perpeffa est, die conclauui exiit, vt res domesticas curaret, hic terrore graui affecta epilepsiae paroxysmo corripiebatur: quod malum ipsam deinde singulis mensibus tempore vel prodeuntis vel cessantis fluxus menstrui inuasit. Sed grauida facta libera illo erat, peperitque tres infantes sanos. At cum primum menses iterum post partum prodirent (prodierunt autem et tempore lactationis,) rursus epilepsiae paroxysmum passa est. Solebat tunc nullo signo praecedente, illico in terram procidere, ipsoque, quo cadebat, momento, validum clamorem, cuius tamen non conscia erat, edere. A paroxysmo sese recolligens, nec quicquam eorum, quae sibi contigerant, omnino sciebat; neque ex vlllo signo praeuio vllloue sensu in aliqua corporis parte

C


aduen-



aduentum mali praeuidere sibi que cauere potuit. Allidendo itaque caput artusque ad corpora dura miserrime sibi ipsi nocuit, faciemque imprimis vulnerauit.

Probe innumera contra hunc morbum adhibita remedia omni effectū caruerunt, donec ego accersitus, cum foeminam non modo epilepsia laborantem verum etiam lienteria atque febris lenta hinc orta totam viribus exhaustam summeque emaciatam reperissem, praescripserim ei praemisso laxante rhabarbarino, decoctum foliorum aurantiorum mane et vesperti sumendum, utque simul lienteriae satisfacerem, solutionem extracti corticis peruuiiani, cascarillae et radicum amararum. Ab eo tempore, quo his uti coepit, ultra annum, ne leuissimum quidem paroxysmi epileptici signum sensit, atque à lienteria febrique lenta curata sanissima vixit, imo tantas recuperavit vires, ut vera plethorica euaderet, eique singulis vel alternis mensibus venam secari opus esset.

Nunc tamen cum haec in publicum edere cogitabam, foeminam venae sectionem
negle-



neglexisse, potuique spirituosorum sese nimis dedisse, ac denuo insultus epilepticos quosdam passam esse audiui.

Foliis aurantiorum curationem epilepsiae esse adscribendam, ego quidem credo, sumpsit enim haec debita dosi foemina, sed ea omnes medicamentorum formulas, concentratis, potionibus exceptis aduersante, extracta in hac formula praescribere coactus fui, horumque solutionem nonnisi guttatim aliquoties de die, sicque non iusta quantitate sumsit. Lienteriae igitur febrisque lentae curationem attribui extracto corticis peruiani caeterorumque posse autumo.

Quid de causa morbi dicam? dixi supra tempore fluxus menstrui ut plurimum nouo morbi paroxysmo correptam, sed grauem vtero, eo liberam fuisse; ergone vterus ejusque structura sic disposuit? Ego vero non credo. Nouimus enim quam parum requiratur, ut epilepsia oriatur ac habitualis reddatur; sed omnium causarum nulla hunc crebrius producit morbum, quam animi pathemata, terror praepremis; permulti ejusmodi casus in historia medica habentur, ego



ipse eorum numerum tribus singularibus epilepsiae à terrore ortae et habitualis reditae exemplis in Dissertatione inaugurali de spasminis descriptis adauxi. Causa semel epilepsiam produciens, dein diathesin relinquit: omnia vero, quibus corpus vehementer movetur ac turbatur, paroxysmum recrudescentem efficiunt. Nec minus notum experientiaeque comprobatum existit, dum menses prodeunt, quantopere moveatur ac turbetur corpus foeminarum imprimis tenerarum, sensuque molli praeditarum. Apparet simul ex observationibus multis, reuera quasdam corporis partes affectas miro quodam imperio in alias licet dissitas efficaciter agere partes. Fateor quidem, nos modum, quo hoc fiat, non intelligere, sicut et nescimus, quo producatur modo epilepsia à terrore. Sufficit nosse talia in corpore contingere. Vnde liquere puto, hujus morbi primariam seu progumenam causam atque originem terrori potius deberi. Post paroxysmum epilepticum semel ortum manet in encephalo talis diathesis, ut proxysmus renouetur a tali causa accedente (qualem in nostro casu fluxum men-


menstruum esse puto,) quae in aliis hanc diathesin non habentibus nihil tale producit.

Fluxum menstruum igitur non pro causa disponente, sed pro causa accedente seu procatarectica, diathesin excitante, habendum esse arbitror.

Talis epilepsiae species ab animi pathemate oriens sine praeuio signo omnium curatu difficillima habetur: curabatur tamen ea à terrore (pessima sane origine) orta in ista foemina foliis aurantiorum, remedio, quod ars nostra salutaris habet, ac quo illa iure gloriatur. Non multum enim praeterlapsum est temporis, ex quo in tractatulo quodam a D^{no}. Hans cel. medico Vesalienfi edito similis a terrore ortae foliis aurantiorum curatae epilepsiae casus describitur. Insurgunt quidem contra talia specifica plures, vanum esse dicentes, si quis ei confidat: nec, cum tot tamque diuersae hujus Herculei morbi dentur causae, putant fieri posse, vt specificum quoddam contra eum inueniatur, vero pace illorum dixerim, quod sensibus percipitur clarissime, id inficias ire nemo potest. Quis enim,


C 3

quaeso,



quaeso, v. c. credidisset unquam, nisi experientia esset edoctus, Magnetem odontalgiam tollere, tollit vero eam profecto, et egomet ipse idem saepius expertus loquor. At intima rerum natura cui prorsus cognita?

Verum enim vero opponet quis in foemina illa denuo rediisse paroxysmum, neque itaque esse illud constans specificum. Sed primum febris intermittens cortice peruiano exterminata, redit demum post longam intercapedinem, ergo cortex peruianus non est specificum contra febres intermittentes? Deinde nouam causam nouus debet sequi effectus; inter causas epilepsiam producentes iure plethora numeratur, atque crapula, omnes enim functiones a plethora laedi possunt, illae ipsae imprimis, quae ab encephalo pendent, turbari, quatenus nempe vasa humores tenuiores ferentia a repletis plus solito vasis sanguineis angustantur atque comprimuntur. Augentur vero omnia haec mala, si v. c. potibus spirituosus sanguis rarefit, et vasa magis distenduntur. In foemina
illa




illa haec duo locum habere, iam ante in-
nuimus, plethoram scilicet et vsum nimium
spirituosorum. Haec itaque cum non tan-
tum instar causarum insultus epilepticos
excitantium agere, verum quoque in non
dispositis epilepsiam producere posse, expe-
rientia doceat, multo magis id efficere in
dispositis valent. In Bonneti sepulchreto
anatomico describitur casus juvenis pletho-
rici, qui post lautius prandium humi ceci-
dit epilepticus, novisque insultibus crebris
intra sedecim horas periit. Exinde sic
existimo, ne foeminae isti usu spirituosoro-
rum interdicator, plethoraeque iusta euacua-
tione minuatur, nullum sane remediorum
genus fore auxilio. Vti et Cl. Locher in-
ter casus suos similis exempli mentionem
facit, juvenis ab epilepsia foliis aurantio-
rum liberati, qui cum vino se inebriauerat,
novus expertus convulsiones, eodem qui-
dem remedio brevi restitutus est, verum
recte addit Vir Clarissimus, fore, vt ille, si
saepius se inebriauerit, haud dubie in pri-
stinum morbum incidat. Specifici vero in-
de non minuitur pretium, praesertim cum



plures alii huius specifici tam salutiferum experti sunt effectum.

Singulare est in nostro casu, foeminam a primo, quo vsa est remedio, tempore ne leue quidem paroxysmi sensisse signum, cum tamen octo dies ante remedii vsum vehementissimo torqueretur insultu: item eam, licet, non nisi quinque aut sex circiter menses vsum remedii continuerit, tamen tempore intermissionis a morbo omnino liberam mansisse, ac nonnisi, cum vsui spirituosorum nimis indulserit, eo iterum correptam esse, idque non tempore fluxus menstrui, sed extra hoc, et quidem contra suetum terminum bis intra octo dies. Quae omnia magis adhuc nostram videntur confirmare sententiam.



Puella 12. annorum vehementer irata per tres integros dies vehementer vomuit, ab eoque tempore subinde vel minima cibi potusue sumpta portione ad vomitum incitata est, imprimis post iram, quod tempus aliquod perduravit, cum interuallis tamen, donec

donec menses prodiissent, a quo tempore rarius per annos aliquot vomitum fecit. Mense Maji 1766 annum decimum sextum agens denuo post minimum ingestum euomere coepit, ac per duos menses hoc miserrimo in statu vixit, (menses licet more consueto prodirent ipsa etiam morbi tempestate) regio umbilicalis, scrobiculus cordis, et hypochondria vehementer intumuerunt. Qui tumor post applicationem emplastri stomachalis aliquatenus minui videbatur, licet vomitus adhuc duraret. Ineunte Julio vomitus cessauit, at singultus quam acerrime facuire coepit vna cum vehementissimis musculorum colli, ac pectoris conuulsionibus, ipsaeque manus conuulsae vix potuerunt immotae manere, cum dolore acerrimo dorsi, scrobiculi cordis et hypochondriorum vehementiore dextri, mitiore sinistri. Quo in statu cum permanisset totam hebdomadem, rejecit deinde redeunte vomitu cum singultu alternante bilem viridem et mucum, nec potuit hoc sedari ipso opiato dato, alius semper obstinate obstructa saporque amarus illi erat.



Vena incisa est non modo sine leuamine villo, verum symptomata increfcebant potius, nec anthysterica ipsaque opiata post repetitam purgationem data aliquid leuaminis attulerunt. Nulla aderat febris.

Ego arcessitus cum dolorem ac tumorem hypochondiorum, dexti imprimis, obstructionem alui pertinacissimam, saporem amarum considerassem, vidissemque nullum ab anthystericis ipsisque opiatis leuamen afferri, deinde cogitassem principium mali, obstructionem hepatis bilemque corruptam esse causam credidi.

Clysteres injici iussi, qui nihil leuaminis dederunt, hinc purgans dari et cataplasmata ex herba cum floribus hyoscyami lacte cocta scrobiculo cordis totique abdomini applicari iussi. Quorum usu continuato dolor in scrobiculo cordis et hypochondriis cessauit, sed singultus conuulsionesque adhuc durarunt.


Praescripsi praeterea post purgans repetitum pilulas ex sapone veneto et gummi ammoniaco, parca dosi scillae, speciebus diambrae additis ac pro potu ordinario



rio decoctum rubiae tinctorum pro lubitu bibere iussi. Quibus cum puella per tres quatuorue circiter hebdomades vſa fuiſſet, ſymptomata diſparuerunt omnia, ipſa optima fruebatur ſanitate vltra tres menſes, rediitque ad ſolitos labores domeſticos, menſibusque per totum illud tempus legitime fluentibus.

Cum die decimo octauo Nouembris multa ligni onera ab inferiore ad ſuperiorem domus partem portaffet, die viceſimo primo ejusdem menſis de dolore acuto in dorſi parte ſuperiore intra ſcapulas querebatur, ac ſaepe ſingultu, conuulſionibus, manuum deinde acerrimo dolore vexabatur, quin de alio malo conquereretur, nec febris adfuit nec appetitus multo proſtratus erat. Dedi ei reſoluentia, lenientia, ſudorifera, dorſum partesque dolentes ſpirituofis antiſpaſmodicis fricari iuſſi, extensionem violentam autumans eſſe cauſam. At haec omnia nihil leuaminis dederunt.

Cumque aliquoties vomitu bilem viridem rejeciſſet, prioris ſupra deſcripti mali quod hucusque ſiluerat, immemor, dedi pur-



purgantia aliquoties repetenda cum leuamine quodam, dein pilulas resoluentes ex Sapone veneto etc. atque decoctum rubiae tinctorum, vt supra indicaui, verum dolor in dorso, singultus et conuulsiones tam cito cedere noluerunt. Menses intra hoc temporis spatium prodierunt. Cum more foeminarum tempore fluxus menstrui nihil medicamenti sumeret puella, aliquid quidem leuaminis sentire videbatur, at quinto aut sexto die quo menses prodire coeperunt, sensit dolorem in hypochondrio dextro et in scrobiculo cordis. Cessante menstruo fluxu repetii supra descriptam methodum, quo facto ab omnibus omnino sensim liberata est symptomatibus, et ad hoc vsque tempus sanissima degit.

SCHOL. Symptomata omnia, varia licet ac diuersa, ab vna et communi producta esse causa, ab obstructione scilicet hepatis bileque acri, tanquam principio et origine mali, iure per supra indicata symptomata autumare me potuisse crediderim. Notum enim est et euidens, quantopere
ejus-



eiusmodi infarctus in parte corporis tum nobili, cuiusmodi est hepar (cujus officium primum est, bilem a sanguinis confortio segregare inque intestini duodeni alueum effundere, quae functio et vitae et sanitati tam necessaria est:) functiones perturbare possit. Bilis deinde ipsa acris reddita tum hepatis tum ventriculi, diaphragmatis aliarumque partium vicinarum hepatis annexarum affligit, irritat et convellit nervos. Hinc dolor, convulsiones, vomitus, singultus caeteraque memorata symptomata oriuntur, quae hinc explicatu non difficilia erunt. Constat praeterea innumeris observationibus, acre stimulus vni applicatum parti facere, ut spasmus constringatur et dolore afficiatur non modo pars, ubi acre illud haeret, verum saepe quoque partes longe remotae, immo vniuersum nonnunquam corpus, uti fusius hac super re differui in Dissertatione mea de Spasmodis.

Primo quidem intuitu mirum videri potest, infarctum suppositum non secutum esse icterum; at experientia docet, humores



mores et infarctus in hepate diu existere posse, ita ut icterus non sequatur (viti ipse in iuvene viginti et aliquot annorum infarctum ejusmodi multo majorem, colore faciei plumbeo, tumore ac vera duritie abdominis, hypochondriique dextri, obstructione alui satis superque sese manifestantem; infuso rhei aquae vinoso, fero lactis cum herbarum recentium succis expressis, pilulis saponaceis resoluentibus, decocto radice rubiae et curcumae longo tempore continuatis, (vno scilicet dictorum remediorum post alterum adhibito) equitatione dein ac diaeta leni ac parca a me praescriptis curatum observauit: hunc casum paucis descriptum data opera ex amore proximi addidi, ne in posterum ejusmodi infarctus incurabilis existimetur: imo calculosae concretiones in hepate frequenter repertae leguntur, ita ut non accesserit icterus. Praeterea naturaliter in hepate nec amaritudo adest vlla, nec color flauus adeoque cum icterus tali colore corporis superficiem deturpat, hoc non ab hepatis vasis obstructis, (viti in nostro casu locum habere videtur)



detur) sed ab impedito exitu bilis cysticae eiusque retropulsione in sanguinem originem ducere videtur.

Hanc meam de morbi natura conjecturam confirmare videntur, ut dixi, dolor et tumor hypochondriorum, imprimis dextri, vomitiones biliosae, saporis amaritudo, alui obstructio, confirmat deinde effectus adhibitorum remediorum saponaceorum resolventium atque attenuantium.





*De Matrona
Cardialgia et Vomitu cruento
curata.*


Matrona triginta sex annorum sensibili admodum genere nervoso praedita, caeterum sana per plures annos post pastum horas duas anxietates et insignes molestias, doloremque grauissimum, compressiuium et constrictiuium in regione circa ventriculum ejusque superiore orificio persentiebat cum vomitu nonnunquam permolesto; ad hanc ego anno 1766 accersitus dicta symptomata cum sensibilitate hujus orificii et inde natam procliuitatem ad sui contracturam spasmus ibi solitum perponderans, causam, quae has anxietates doloresque parit, acriora stomacho, hostilia alimenta sub digestionem corrupta, viscidam inde ortam materiam ac acidam orificio stomachi sinistro impactam acore rodentem ac vellicantem, stomachumque quasi perterebrantem esse autumaui. Mature igitur causam stomachum irritantem remouendam esse credidi, ac vomitoria hic excellere sciui, at
hacc



haec refutauit omnino aegra, nec ob doloris vehementiam, haec dare ausus sum, purgantia inde dedi; quoniam vero et haec per se stomacho inimica et molesta, irritando eius orificium finistrum doloremque itaque intendendo, facile possent exasperare malum, propterea conuenientissimum esse arbitratus sum, vt iisdem lene adderem opiatum, lene dico, ne opiato palma maneat et vis purgantis plane ab opiato impediat; conueniens hoc *ευπρόρισον* est ejusmodi in casu, si duobus scopis simul nempe dolori sistendo et materiae remouendae satisfaciendum est. Dein acida corrigentia, absorbentia, tartarum vitriolatum cum rheo et speciebus diambrae, decoctum cornu cerui. Emplastra Stomachicalia applicare volui, ast haec, vti saepe apud plures hystericas obseruatur, ferre non potuit. Dictis adhibitis malum leniri, ast non omnino tolli potuit; placui ergo dolorem natasque inde angustias enematis ope aqua communi cum Laudani liquidi guttis quadraginta, hancque methodum securiorem ac certiore saepissime inueni quam ore sumptum, vt optime

D

monet




monet praeclarissimus Whytt, in tractatu suo non sat laudando: de observationibus circa morbos neruorum, dedique praestantissimum ab eodem auctore commendatum et vt optimum in eiusmodi affectibus notum remedium, Moschum puto, aegraque mea integre sanata est a malo suo, quod altas iam egit radices, nec semel ab eodem tempore vel minime a malo vexata est.

Eadem haec Matrona post tres annos post spatiationem in rheda peractam, corporis motu forsan nimio, simul animi motu (cui nimis dedita est) agitata, domum rediens de anxietate praecordiorum et dolore compressiuo ac constrictiuo in latere sinistro in ea regione, quae costis nothis anteriora versus sternum se inflectentibus, conquerebatur; haec excipiebant Lipothymia peruehemens, nausea et vomitus cruoris concreti atro-rufescentis aliquot librarum. Ego hoc tempore accersitus venae sectionem commendaui, verum hanc ob nimium ortum languorem atque ob metum ne sub hac animi deliquio periret, renuit,




renuit; cum vero menses aliquot diebus ante fluebant, subque ipso vomitu animi deliquium insequeretur, ac sanguis inde cum leuamine sistebatur, hanc intermisimus, inque aliud tempus distulimus, lectoque quiescere iussi, emulsionem ex seminibus quatuor frigidis majoribus, papauere albo cum aqua plantaginis, nitro, trochiscis de Carabe, et absorbentibus, enema commune cum nitro praescripsi, cumque enemate injecto multum sanguinis grumati atrii excretum est. Extrinsecus regio stomachi fomentabatur aceto et spiritu vini, pedes inuoluebantur pannis aqua frigida imbutis, pulsibus applicabatur coagulum aluminosum linteis exceptum. Bene sese habebat. Tertio die vespere me incio e lecto surgebat rebus domesticis operam nauatura, vomitu cruento recidiua effecta est, qui iterum animi deliquio insecuto sistebatur. Tunc iterum ob debilitatem summam vena secari non potuit, et cum multum sanguinis euacuatum est, non solum frustranea fuisset venae sectio, sed etiam magis facta euacuatione aegra nimis de-



bilitata esset. Sed potius ad alia remedia accessi. Emulsionem nitrosam supra indicatam, tincturam rosarum Pharmacopoeiae Londinensis ex mensura aquae spiritu Vitrioli guttis viginti et vncia semis florum rosarum saccharo edulcoratam pro lubitu sumendam, massae pilularis de Styrace cum nitro dosim tempore somni, rheum dein praescripsi, ut relictus sanguis cruentus e corpore pelleretur. Cumque rheum sine effectu assumptum est, enema injiciebatur, atque externe, quae supra indicaui continuabantur. Dein infusum corticis peruuiiani praescripsi. Verum aliquot diebus post bene sese habens, iterum meque inscio atque inuito e lecto surgens aegra vomitum cruentum reciduum perpeffa est, qui vero dictis, mixturaque ex aqua Menthae cum confectioe Japonica adhibitis, sedabatur, atque enema in dies injiciebatur, cum rheum nulli effectui erat, aliusque enemate omisso obstinaciter obstructa erat. Omnia bene sese habebant, praeterquam quod



quod admodum, vt facile conjecturari potest, debilitata esset aegra, ita vt ne membrum de loco mouere potuerit, deque vehementissimo capitis dolore semper, aliquando de praecordiorum anxietate conquerebatur, atque ne minimus cibos capiendi aderat appetitus. Serum lactis, aut aqua communis pani decocta, in quibus ferrum extinctum erat, pro potu communi adhibebatur, cibique facillimae digestionis vt decoctum panis triticei, jura carnum e pinguedine sollicitè expurgata, gelatinae e cornu cerui, atque Capone et pedibus vitulinis et similibus, nunc de Cancris parabatur. Hisce vires refocillari videbantur, verum interea menstruata post animi affectum, animi deliquio iterum perpeffa admodum debilitata est, cumque ante nulla aderat febris, nunc febricula accedebat, verum lacte caprino mane ac mixtura ex Cortice Peruuiano et cascarilla cardiacis iuncta praescriptis, diaeta optima ex cibis electis nutritiuis refocillabatur, nouasque recolligens



vires ad hunc vsque diem sanissima viuit, licet tantum sanguinis per recidiuos vomitus amiserit; vt sanguis e digito acu laeso prodiens non rufescenti sanguini verum succo ceraforum vix similis esset.



Hae-



Haemorrhagia

vteri enemate oleoso curata.

Nihil est tam arduum humanae sedulitati, ait Bagliuius, quam inuestigatio causae primo-primae et proximae, quae singulos morbos in actum prouocat, et hominem immediate laedit. Hoc est, quod erroribus grauissimis ansam praebuit incredibilem. Sique in inuestigandis morborum causis sedulo non perpendamus, respiciamusque ad causam procatarcticam, de curatione morborum nunquam bene sperandum. Non diu est, quod id de haemorrhagia vteri in foemina triginta aliquot annorum observavi. Huic dudum inordinato menses recurrebant fluxu, nec certam obseruarunt periodum, nunc anticipando, interdum vage comparendo, tandem copiosa superuenit vteri haemorrhagia. Aegra cum ultra tres septimanas hanc pertulisset, imbecillis admodum et pallida fit. Varia tentat pro levando malo, sed quaelibet frustra. Ipsa ergo anxiosa, vrgens remedium, me accer-



fiuit. Omnia igitur debite ponderans, solitis haemorrhagiae causis hanc attribuere, nec in loco affecto vitium reperire potui. Perscrutans diligentius, pruritum circa anum, et in ipso intestino recto occurrentem, et ad frequentem alui depositionem urgentem animaduertens, mox de ascaridibus circa intestinum rectum existentibus cogitaui, quae vterò vicinae hunc vellicant, atque irritant, occasione sensilis hujus irritationis ceu spinae circa vterum infixae copiosius sanguinis ad vterum mouetur, vberiorque sanguis effluxus. Enema igitur ex oleo lini optimo ad destruendas ascari- des remedio injici curaui, ejectae sunt cum enemate incredibili copia ascarides, enema aliquoties repetito, haemorrhagia cessauit. Causa sicque mali sublata tollebatur effectus et symptomata, stimulo scilicet ab ascaridibus orto cessante, velut spina euulsa, cessauit impetus et consequenter nimius affluxus sanguinis ad vterum.




Tumor



Tumor in Genu.

Saltuarius aëris injuriis tempestatibusque humidis totos saepe dies hyeme non minus ac aestate expositus, tumore in genu sinistri articulo, successiue incrementum capiente, afficitur cum sensu doloroso, et duritie ac difficultate mouendi partem. Varia a variis per duos annos adhibuit remedia, sed omnis in cassum cecidit cura. Tandem ipsi consuluerunt, tumorem aperire. Ast bona fortuna me in consilium trahit aeger. Insignem hic obseruo obstructionem et contumacem vasorum lymphaticorum glandularumque imprimis hujus loci infarctum, perque hanc factam obstructionem et infarctum naturalis humorum cursus motusque per partium meatus et vasa subtilia, maxima ex parte impediabantur, vnde pars tumida, dura, dolorosa et motui articuli naturali inepta. Pedibus scilicet totos dies frigido ac humido aëri expositis transpiratio impediabatur, porisque clausis vitiosum transpirabile coërcebatur, vt nequiret exhalare, fixabatur in articulo, viscidum et




glutinosum reddebatur. Primam hoc dedit ansam dicto tumori, qui dein contumax et fastidiosus deueniebat. Lympha hoc in loco accumulata dilatabat eneruabatque vasa lymphatica, ita vt aqueus hic liquor impediretur moueri, immo non sine ratione autumarem, humorem hunc fixatum non amplius esse liquorem aqueum omni modo insipidum, innocentem, spissitudine solummodo peccantem ac viscositate; verum certo crederem, quod sit falsedine diues, pungens, inde tumor hic dolorosus ac pungens, licet et dolorem ab expansione membranarum ac tendinum exoriri posse non negarem.

In malo hoc praesenti in externa corporis parte collocato, medicaeque diligentiae externae exposito remedia similiter externa et localia locum habere, nullum est dubium. Resoluentia igitur stagnationi humorum opposita, atque attenuantia, vtpote quos resolutos in naturalem motum reuocant, adhibeantur oportet. Praescripsi itaque fomentationem ex herbis resoluentibus aqua coctis, addito lixiuio saponacco, tepide



pide applicandam, linimentum dein ex vnguento albo camphorato et petroleo, quocum inungatur pars affecta statim a fotu applicato. His externis junxi interna, purgans primo aliquoties repetendum, decocta dein tam diuretica quam in specie diaphoretica. Quatuor septimanarum temporis spatium malum, licet duos iam annos vexarit aegrum, tollebatur. Praedictas herbas dein aqua ferraria coqui et partem affectam colatura fomentari jussi, ut pars confortaretur, neque recidiuaret malum. Nec rediit, partemque ut sanissimus mouere potest, imo ne vicissitudinem quidem aëris, ut alias fieri solet, sentit in parte.

Dictis obseruatis, quaeritur an consilium datum aperiendi tumorem, tuto adhibendum fuisset? Responsio, consideratis circumstantiis ac loco affecto, negativa facilis est. Locus affectus est genu, ubi ligamenta, perioestia, tendines, cryptae Haversianae facile offendi possunt, labem impressam longe facilius retinent, sanatur difficulter. Quum enim omnes hae partes membrana cellulosa intercurrente separatae,
atque



atque hinc lubrica mobilitate agiles inter se sint, ita quoque si membrana haec semel suppurata fuerit, sinuosae hinc inde fistulae relinqui, noua sicque mala recrudesce-
re, tendinesque, ligamenta et ceterae membranae inter se concreescere, atque mobilitas partis prorsus tolli possent.







C a t a r a c t a.

De differentiis cataractae deque opinionibus veterum et modernorum, an in humore aqueo, num in lente crystallina vitium sit, non loquar, id relinquo, qui ex professo hac de re scripserunt; de cataracta incompleta nondum concreta tantummodo verbum dicam. Si scilicet aut in humore aqueo aut in lente crystallina, ut moderni putant, impedimentum se offerat, quod radiis transitum neget, sicque visionem plus minusue tollat, substantiam istam heterogeneam adhuc fluctuantem ante sui concretionem, inque membranae consistentiam coalitionem, discuti, resolui medicamentis posse, sequens probat exemplum:

Foeminae quinquaginta quinque annorum subito et improuiso totalis inducebatur caecitas sinistro oculo, dexter obscurabatur, ita ut dextro omnia obuersantia per fumum et nebulam videri viderentur, sinistro



stro contra ipsum lumen aut solis splendorem propius admotum vix videre potuerat. Color pupillae sinistri omnino, dextri oculi minus glaucus oculum inspicienti apparebat. Ipsi primo morbi die venam secari, altero catharticum sumi, tertio die vesicatorium, quod bis repetebatur, applicari suasi. Collyrium dein ex aqua chelidonii majoris cum spiritu salis ammoniaci, vitro antimonii et camphora. Fumusque ex herbis euphrasiae, rorismarini, majoranae, salviae, flor. chamom. fistulae tabacariae immixtis ac accensis ortus oculis inflabatur. Interne pulverem ex sulphure aurato antimonii tertiae praecipitationis cum mercurio dulci mane, et vespere dosim pilularum ex extracto centaur. min. cochlear. hellebor. nigr. fumar. gum. juniper. ammoniaco aceto squillit. solutis mercurio dulci, et extracto panchymagogo Crollii, nec non infusum ex radice foeniculi, valerianae, herba melissae, salviae, betonicae, euphrasiae, floribus arnicae, femine foeniculi et cortice citri sumpsit. His omni cum diligentia adhibitis



hibitis aegrae intra quinque sexue hebdomades visus restitutus est, omniaque observantia specilli ocularii ope commode videre potuerat.

F I N I S.



Impr. apud G. L. Winteri Viduam.

EXPLICATIO TABVLAE.

Fig. A. Lumbricus latus e corpore viri expul-
sus.

a. Caput cum duobus corniculis.

b. Articulus.

c. Tubercula seu papillae.

d. Latitudo primarum partium expulsarum.

Fig. B. Vera lumbrici e corpore foeminae
expulsi forma.

a. Articuli.

b. Circumplicationes et inflexiones vermis.

Fig. C. c. c. Cucurbitae, seu partes lumbrici
separatim expulsaе.

Fig. D. Cucurbita a vitreo perspicillo aucta.



Fig. A.

a. b. c.




Fig. C





Fig. D.

Fig. B.



1871

1872

1873

